



Ins duai laschar valair ina crusch sin in culm sco in'ierta patrimoniala.

Litas davart la crusch

In istoricher ateist s'exprima

DA GUIU SOBIELA-CAANITZ

■ **Dacurt ha la vischnanca da Triengen/LU fatg pender si cruschs simplas, empè da crucifixs, en sias stanzas da scola. Quai ha stimulà cuss. naz. Ida Glanzmann (LU), viceparsura da la pcd svizra, d'annunziar in'iniziativa parlamentara «per il dretg d'exponer ils simbols da nossa cultura cristiana occidentala».** Quai na pertutga betg mo cruschs e crucifixs, mabain era parsepens, statuas e pignols da Nadal – schebain ch'in pignol, simbol pajaun, n'ha en sasez nagut da far cun l'istorgia da Nadal. Forsa stuainsa ina giada vuschar en chaussa. Quai fa probablamain il cussegl grond lucernais avant il suveran svizzer, perquai che la pcd da lez chantun pina in'iniziativa en quel senn. 2009 ha il pievel svizzer approvà il scumond d'eriger minarets; aifer paucs onns pudess ins ans clomar a lubir u scumandar l'exposiziun da simbols cristians en lieus publics. Il teolog rumantsch Ursicin G. G. Derungs manegia: «Secapescha stattan davos il 'gie' all'iniziativa encunter ils minarets buca ton motivaziuns religiusas, mobein plitost politicas e da tip psicologic, la tema da piarder l'identitad occidentala ni schiglioc zatgei auter. La megliera moda e maniera de viver quella 'identitad cristiana' fuss de viver ella en tut sia riezia millennara culturala e religiosa che cumprendess era la carezia proximala e la toleranza. Mo l'Europa ei secularisada, il cristianissem ei zuar in factur cultural, mo tenda pli e pli a daventar museals, ual grazia a quels che defendan el encunter ils minarets, mo han buca marveglias da praticar el» (La Quotidiana dals 28 da settember 2010). Al Dies academicus da la Scola auta teologica a Cuira ha la rectora «tematisau la schientscha carschenta per damondas religiusas che semanifesteschi era ellas debattas davart la preschientscha da simbols religius en localitads publicas entochen tiel plazzament da cruschs sin las muntognas» (La Quotidiana dals 12 da november 2010).

Cristianissem ed identitad

Ils 8 da november en «Le Courrier»

(Genevra) è l'istoricher genevrin Christian Grosse s'exprimì pli manidlamain davart las stentas lucernaissas. En il chantun Genevra regia ina separaziun radicala tranter il stadi e las baselgias. L'Universitad da Losanna perencunter ha ina Facultad da teologia e da scienzas da las religiuns nua che Grosse è professor ordinari; quai na l'impedescha tuttina betg da sa definir sez sco ateist e da crititgar «cuss. guv. Philippe Leuba [Losanna] (...): Lez, en ses pled da la Rogaziun federala, ha declarà (...) ch'ina religiun [la cristiana] saja pli abla ch'in'autra [l'islam] da sa sviluppar (...). Per in istoricher è quai in'absurditad ed ina cumprova caratteristica d'islamofobia.» Grosse fa endament ils tschientaners da cristianadà, cur ch'il cristianissem «scumbigliava religiun e stadi». El crititgescha: «Las partidas svizras abusechan la dumonda da la toleranza e da l'intoleranza; quai vegn cumprovà da l'iniziativa cunter ils minarets. Perquai vegnan las debattas pli radicalas areguard religiuns. Era l'Uniun svizra dal pensar liber prenda posiziuns adina pli fitgadas (...). Quai che jau, sco ateist, temel dapli è ch'ins defineschia puspè nossa societad tenor ina religiun (...). Igl è paradoxal ed artificial da sa definir collectivamain sco cristian, schebain che las religiuns èn adina pli pauc implitgadas en las instituziuns (...). Sch'ins formulass nossa identitad tenor la religiun, tradiss quai insaquants tschientaners da secularisaziun.» L'istoricher cussegla da tschertgar schliaziuns pragmaticas e dat sco exempel «il Departament friburgais d'educaziun che ha gist exprimì insaquantas recumandaziuns tut tenor las circumstanzas».

Pro e contra crucifixs a scola

Grosse crititgescha ch'ins ha resgià giu ina crusch sin in culm friburgais: «Ins duai laschar valair ina crusch sin in culm sco in'ierta patrimoniala; uschiiglio duess ins logicamain destruir tuttafatg las baselgias. En ina scola perencunter munta ina crusch l'introducziun d'in element religius en in spazi ch'il consens general na resguarda betg

sco religius. Ma en Vallais ed a Lucerna han ins lubì il crucifix; quai mussa che schizunt ateists al pudevan cumportar. La debatta actuala metta insumma en dumonda las relaziuns da quels chantuns [e d'auters, G. S.-C.] cun il cristianissem. La constituziun federala entschaiva cun ils plets: 'En num da Dieu tutpussant'. Cun quest prolog problematic na possa sco ateist betg m'identifitgar.» Il schurnalist rapporta: «A l'entschatta d'october han ins desditg in magister da Stalden/VS che refusava da laschar valair in crucifix en sia stanza da classe (...). La debatta che sa dera en Svizra è gia vaira preschenta sin stgalim europeic. Ina burgaisa taliana domiciliada a Padova ha purtà plant encunter crucifixs a scola. Sin quai, a la fin da 2009 ha la Dretgira europeica da dretgs umans (Dedu) a Strassburg pronunzià ina sentenza che cumandava expressivamain a l'Italia d'allontanar ils crucifixs da tuttas scolas statalas. L'indignaziun è stada enorma e la regenza [da Silvio Berlusconi] ha fatg svelt recurs. Da zercladur 2010 è la dretgira sa declarada competent a areguard il recurs; ella duai sentenziar en curt. En il fratemp han var ventg regenzas europeicas (...) sustegnì fermamain l'Italia – ni la Frantscha, ni la Germania, ni la Gronda Britannia, mabain tuts pajais da l'Europa centrala e da l'ost, cunzunt quels da tradiziun ortodoxa.» Quai s'enclegia sch'ins fa endament la relevanza da las iconas en la tradiziun da las Baseligias orientalas. Ma la visita da papa Benedetg XVI en Spagna ha mussà che l'atmosfera là è vaira differenta. Ils 20 da november 1975, avant gist 35 onns è mort il dictator Francisco Franco Bahamonde, «caudillo de España por la gracia de Dios» en virtid dal «nacionalcatolicismo». Questa ideologia definiva l'identitad spagnola tenor in catolicissem fitgà; ses ertavels, enragischads en il 19avel tschientaner, na pudevan betg franar la secularisaziun. Las regiuns da l'Europa han cuntanschì s-chalims differents en quest reguard; i duain pia definir lur relaziuns cun las religiuns a moda flexibla e cunzunt vardavla.